estant fait au corps & non aux particuliers, est nul: La bourse Clericale de S. Nicolas, à laquelle il donne la fomme de trois mil liures, a esté authorisée par la Cour, à la charge qu'elle ne pourroit accepter ny legs ny donation. Ce Testament authorise cinq ou six Compagnies nouuelles, que la Cour ne cognoist point, comme celle du Saint Sacrement, à laquelle il fait vn legs; La nomination des executeurs est de consequence, elle authorise des Confrairies incognuës, & la succession du Pere Bernard. Cela va bien plus loin que l'on ne pense; il est necessaire que la Cour interpose son authorité, & guarisse des maux qui peuuent tourner à grande consequence. Pour ce qui est de la somme de trente mil liures, il n'y a point eu de donation parfaite, ny d'acceptation: ceux entre les mains desquels elle a esté deposée n'ont pas eu pouuoir d'accepter; ce sont particuliers qui se disent Procureurs d'vne Compagnie qui n'est pas authorifée: La fondation d'vn Euesché de Canada n'est pas necessaire, on peut dire qu'il ne s'enfera iamais d'establissement : ce n'est pas aux particuliers à entreprendre les choses de cette qualité; & si on a parlé de cela dans l'Affemblée du Clergé, ça esté depuis qu'on a persuadé au sieur le Gaufre de bailler la somme de trente mil liures, voire mesme depuis sa mort, afin d'auoir vn pretexte de retenir cette somme. Les intimez & defendeurs se promettent que la Cour considerera qu'il n'est pas juste de despouiller vne famille; Que les legs qu'on appelle pieux, doiuent estre temperez par la prudence; & qu'elle declarera